

NENE TA REAPARECE COMO "MAMA SOFIA"



ORANJESTAD(AAN): Kende no conoce "juffrouw Nena"? Nena Vrolijk, maestra di school, traductora, y actriz.

Nena a cumenza demostra su talento pa teatro y stimacion pa teatro desde su carrera como maestra di school. Semper e tabata tuma parti den presentacionnan di

muchanan di school na ocasion di fiestanan parokial of escolar, kizas nos grandinan ta corda: "Na port'i cielo", "Maupi", "E cria di confianza".

Su stimacion pa actua den obranan tabata un di e paceranan di mas grandi di su bida.

Su prome presentaicon oficial tabata den e obra grandi "Susana" un traduccion for di hulandes pa papiamento, den cual el a hunga e papel principal di "Sofia" tambe conoci como "Chepa, supla bo nanishi".

E obra aki a wordo presenta den teatro "Aurora" na Sta. Cruz na ocasion di 75 aña di Padernan dominicano na Aruba.

E obra aki tabata un gran exito cu a wordo repiti un of 2 aña despues.

Cu Centro Apostolico Arubano Nena Vrolijk a participa den "Golgotha", "Asina sa Biba", "Un soño di Pasco" y "Bo felicidad ta cerca mi".

Cu Grupo Artistico Estrella, el a participa den "Nos cu nos" y otro anochinan cultural "tras di cortina".

Cu apertura di clubgebouw "San Martino" na 1947 e tabata tin e papel principal den e obra di 3 acto: "Ai mi nervio".

Despues a sigui na 1948 e obra grandi di 3 acto "Ketty n'sa ganja nunca". E obra aki a wordo ripiti na ocasion di apertura di Cas di Cultura.

E mes aña den club San Martino el a sigui actua den "E famoso idea di Sra. Spijlo" hunto cu e actriz juf. Maria Werleman q.e.p.d.

Tambe den e obra "E kier ta un gran señora".

Como un di e co-fundadornan di mascaruba el a ocupa puesto di vice president, president y comisaria pa varios aña. Tambe e tabata co-fundadora di "Stichting Teatro Arubano" na 1963 como secretaria.

Cu inauguracion di e teatro en aire liber di Cer'i Nokca el a hunga den e obra mahestuoso: "Maria di Cer'i Noca".

Como traductora varios obra di Mascaruba a pasa bao di su man e.o.: "Veneno Sabroso", "Veneranda Daña Rol", "Cada famia

riba su mes pia", "E anochi di 18 di januari", "Macuarima-Wadirikiri (como "kudawecha, e curandera) "Baha foi mi lomba", "Cas di Bernarda Alba", "Mishilikeiro", "Rosa di Alahambra".

Pues den su carrera como actriz y miembro di Mascaruba, el a actua desde 1961 te 1980.

"Grup Amistad" a honrele cu Premio "Actriz di Aña 1972-1973".

Na 1988 Aruba International Theatre Festival a duna Nena e homage door di a dedica e festival di teatro ey na su honor. Ultimo añanan el a yuda "Cas di Bijbel" cu traduccionnan di oracionnan y lecturanan na nos idioma papiamento.

El a bisa cu poco poco e ta bay aleha for di escenario di Teatro pero e ta keda activo pa cualquier otro trabao. Tambe e kier y ta gusta pa ta consejera di cualquier grupo teatral, claro esun di Mascaruba na prome lugar.

Den "ken ta keda cu mama?" Nena lo actua como Mama Sofia.